


5563.8
8241
v.2

桐溪集
二

BERKELEY
LIBRARY
UNIVERSITY OF
CALIFORNIA



BIRKELEY
LIBRARY
UNIVERSITY OF
CALIFORNIA

桐溪先生文集卷之二

記

葛川林先生旋門重修記

明廟之十八年縣監朴公應順以先生兄弟孝行報
方伯方伯聞于 朝越明年甲子 上命旋其閭時
朴侯已去矣李侯孝彥幹其役粵自不憊若子若孫
相繼夭折仁後之理幾乎熄矣斯門之雨風於上旁
者盖有年所今侯沈公宗忱下車未久茅綿于宿草
式于門嘆古制朴楠詢于鄉人圖新其規於是一方
之為士者爭趨赴之柱焉有礎瓦以代茅儼然為瞻

望之所矣某諗于會曰先生孝友之行自家施於鄉
由鄉達于國人皆耳以門之目以旌之心以銘之固
未嘗加損於門之存廢也然而國家必表而榮之者
非直為觀美也將使人人有所觀感發其固有之良
心也嗚呼孰不有父母孰非為父母之子如使過斯
門者仰而觀俯而敬則孝悌之心必油然而生門一
間而興孝於一國旌一人而明教於萬世則斯門之
有功於世道尚矣然則我侯重修之心實體先朝
旌表之盛意而嘉惠後學增光二侯者豈偶然哉為
吾徒者喑無一言以誌之何以考引侯之聲而接吾

人於道也咸曰然於是乎記之萬曆紀元之廿八年
八月日後學八溪某記

大靜縣東門內圍籬記

萬曆甲寅
秋八月日

漢挈一支南走百餘里分為東西麓東者曰山方岳
也破古未岳也西者曰加時岳也毛瑟浦岳也直南
而至海列為松岳山加波島磨羅島皆穹窿突兀有
竒狀甚破古以為龍加時以為虎黃茅滿野去海十
里有孤城周遭者乃大靜縣也縣客舍之東城東門
之內自南而北數十步許籬以圍之者是吾攸居前
為民舍太守聞吾來空其家以處之屋有两脊南北

相向北脊故而陋其架凡四而暗黑如恭卑不直躬
狹不容膝烟煤滿壁衣冠點污不可一刻居南角半
間為土床以為寢室蓋土俗不喜為堦獨此家以此
見占東北角置木豆藏之糧資其外作溷舍半架西
角加設一間為厨所泥以塗之穴以明之竹以戶之
以防狗竊南脊之架與北脊同而營之未久不甚汚
陋自東第一間作火堦為婢僕所處之地第二間空
之為出入之路以板戶開閉之置白其側土俗有白
無脊不得不循俗也西二間通其中不隔置木平床
為待客所床未滿處編竹鋪之南北兩脊之間相距

十餘尺太守為吾作書室二間背東面西東距城堞
僅四五尺西有橘林籬高僅見樹梢其室之制樑長
五尺皆用布尺柱高四尺椽合兩邊凡五十四箇不礎而
土茅而不編以厚積不漏為度其上密置長木貫以
大索相為糾纏蓋海上多風常有拔屋之患故民俗
皆然北一間為溫房南一間為廳事房內長廣皆五
尺廳亦如之以紙塗其突油之鋪以草地衣廳之鋪
亦同房之西壁有小窓南以向廳有戶廳之東南壁
有窓皆小其西空而不壁又於房東壁矢窓下置書
架二層閣經史數百餘卷整頓不亂秩着駟冠服道

衣居處其中閑來展卷睡至支頤泊如也舍之西簷短不足蔽陽乃立三柱作松簷廣數尺長竟二間之舍柱用蘆其大可兩手合圍太守曰此乃海上漂流之物也似竹非竹人言浙江有蘆如許云吾得以珍之竟用於此無乃有數存乎相與拍手編山竹為簷蓋其上名曰松簷而松在漢挈之上斫而輸之動經數日取其便易者為之名實雖似不孚松與竹何擇焉圍籬之制雜以山竹柎木真柴厚密無罅孔其高出屋脊之上計可丈餘以長木作帶結之者四層恐其高而易覆內外立柱撐之北東南三面皆接簷全

不見天由西方見之者若坐井者然籬之內東西常有餘尺南北居三之二向南作板門西傍置小竅所以通飲食也入圍籬時金吾卽具冠帶據轎床坐門外令羅將挈我入置閉其門封之從籬西作小扉蓋其例然也既入定遇一土民問之曰此地風土吾嘗聞之矣恒雨少日恒風少靜霍濕中人人或眩仆今來數日大陽登輝燥濕之侯與內地不甚相遠豈前所聞誤耶其人曰然環瀛洲一域莫非洋中窮島而此縣濱海尤近地形卑下瘴毒之氣三邑中最甚自春夏交至秋八月初淫雨連鬱不開盲風發作無時

瘴霧昏塞咫尺不辨人物當是時棟樑窓壁水滴如
泉衣冠牀席潤濕如泥是故雖有衣貨穀米經夏即
腐終歸無用至於門戶樞金經數年亦皆銷朽況於
血肉之軀乎吾儕小人生長於斯習與性成內地朝
官何以堪處秋氣欲晚西北風起則瘴癘少開陽精
呈露果如近日矣然冬或不寒夏或不暖氣候回互
寒暑逆置故衣食難節疾病易生至如蛇虺蜈蚣螻
蚓等蠢蠕之物皆經冬不死草木菁韭葱管凡種植
之類雖冬深皆取諸圃疇而用之舉此可知其他余
聞之咄咄歎曰此真別一區也宜吾負罪者居之余

昔年承 恩譴宰北塞北塞風土亦云乖常援彼比
此不啻天淵罪有輕重故所居之善惡亦異况彼專
城而此圍籬固不可同日語噫以吾之罪則當死無
疑幸賴 天王聖明生放海島今日與若等同笑語
亦莫非 恩波之及風土之善不善何暇論說對者
噓唏而退仍記其略使子姪輩知吾之所處如此云

鄭賡甫滿月堂記

自余為僇人密棘以梲之高扃以閉之所見不過尺
天也所步不過尺地也耳膠膠無所聞也目昏昏無
所見也心慙慙而不宅於軀殼之內也本為禦魑魅

來也反為魑魅所侵欺迫賈者且有日今年春暮族
弟鄭君贊甫以書來曰吾築堂既成又鑿其下池之
滿月其扁也煩兄其記之且題詠以寄吾將圖刻揭
諸楣也余閱書未了心魂飛越忽如身倚高軒手弄
素波向之瞢者醒昏者嘗慙者愜快然若沉痾去體
也飄然若病鶴之出樊籠也冷然若御列子之風而
翔乎寥廓也噫斯堂吾固登之也斯池吾固見之也
其時未甚以為奇也是何贊甫之一書能起余若是
也遂援筆而為之歌歌曰賢哉贊甫肯構其堂惟堂
之敞背陰面陽于以鑿之貯漣其中惟源有水其出

無窮烟霞不孤風月攸居彈琴其上其樂只且倘有
客見而問之曰堂則美矣抑其所卜之地亦有佳致
未余又應絳而歌之歌曰洞號葛川地接龍門青山
作屏白水為藩花明柳綠古之桃源泉甘土肥今之
盤谷民風淳美君子之澤吾弟居之爰得其直客曰
堂池之好洞府之勝既聞命矣第未知滿月之名其
意安在願卒聞形容之妙也余乃沉思默會續而歌
之曰堂高而虛月出照兮池淨而深月生耀兮到天
心處無片雲時排窓八戶滿屋輝輝月愛堂乎堂邀
月乎無心相值以永今夕歌罷咄咄嘆曰猛虎在檻

聞風矯首神龍失水聽雷掉尾何者畏約之甚故感
發之易也山水吾癖也風月吾主也一出世路百計
歸虛孤囚窮島與死為隣於斯時也賡甫之請及之
其不為聞風之虎乎其不為聽雷之龍乎狂歌之作
烏可已也客噓唏而退因書其歌以寄之歌凡三章
十二句又以四韻一首題于左題之者誰桐溪鼓鼓
子也年月日何萬曆乙卯之夏四月辛巳也

挹湖亭記

余始省事則聞嶺之南有吳德溪鄭藥圃兩先生者
出負斯文重望為國家耿光連駕駢驚歷敷於清顯

之列一時稱之吳鄭若漢世之李郭齊名者焉厥後
德溪早謝簪笏退歸于家卒不永年藥圃位鼎軸勲
業赫然年七十乞骸骨終老于其鄉兩先生官位雖
有高下而其清名峻望為終始完人不失時人之望
則一也余生晚地遠恨不得樞衣於兩先生之門而
得其餘論怛怛悵悵坎然者今四十年餘矣今年夏余
承 召入城適其時藥圃之孫齋即公以先生請謚
亦來京師時時造余頗致殷勤之意居無何余以言
事被臺評竢命於國東門之外齋即公一日來見余
袖出文若序二篇示余曰此吾扁亭之作也願得丈

人一言責諸楣間余笑曰僕末也且不文何能副子
望齋即公請不已余又自念曰四十年山仰之餘幸
見幹盡之孫不猶勝於元賓之所與乎齋即公无所
挾猶不敢辭其請况其有文好禮足以世其家者乎
遂以不腆之語贈之曰夫江湖者士之不得於世者
之所能安也以子之文與行苟能勉勉焉益聞其所
未聞益修其所未修以不墜其家聲則當今聖明在
上賢公卿宰物者必不老子於湖亭之中子之挹湖
光恐無暇也子其勉之哉若余者老已至矣行當謝
其事歸死於窮荒寂寞之濱何由致其身於湖亭之

上游目騁懷瞻挹大君子之餘風遺躅也哉余於此
深有感焉崇禎八年乙亥六月日桐溪鄭某書于洛
城之東門外旅寓

某里鳩巢記

丁丑春自南漢還不處于家
築於是祠以為終老之地

凡物莫不有名稱大而天地之高厚日月之光明江
海山岳之流峙小而草木之微禽獸之衆川溪石巖
之細至於間井坊曲之瑣屑皆有名稱以識之而獨
斯洞之以某名之者何歟蓋斯洞也若深而不深若
淺而不淺謂之高也則去村落不十里也謂之卑也
則占上峯三之二也呀然成谷而自外視之不知其

有谷也夷然寬平而自下觀之不知其寬平也以其形勝則無溪澗泉石之可觀也以其方位則無東西南北之可名也意者古之人求其名而不得乃命之曰某里者歟歲丁丑春桐溪鼓鼓翁自南漢歸鄉里身病且老知無復有為於斯世求可以終老之地而適得斯洞焉於是鼓鼓翁悅其名乃搆木為數架之巢如鳩之拙故名之明年夏曳病來處所隨者一部朱書也所從者數三童冠也於是焉寢宿於是焉遊處不知老之將至焉不知人間之有毀譽欣感焉不見催科督賦之官吏焉不聞黜陟擠援之朝政焉於

是鼓鼓翁身安心逸考盤而為之歌曰窈窕方某里
從某至某方凡幾里某年方某代某誰為之慳秘一
朝秘不得方而畀某翁某翁方得之遯伏乎其中不
知某里之得某翁耶某翁之得某里耶雖不知某之
得方終吾生而栖止於是有某客從某所來聞吾歌
而笑之曰古之隱者之居無有無名者巢父之箕山
也四皓之商山也子陵之桐江也其餘何可盡數子
之居獨稱某者不亦異乎曰此吾所以樂之而不欲
捨者也彼三子者皆有高尚之志聞堯之讓天下而
洗其耳辱漢之善慢罵而逃其迹欲以一絲扶九鼎

而高舉焉是宜其居之有稱號而後人目其地而慕其為人是則然也若余之隱異乎三子者之撰非有所為而隱也猶有羞惡之心而隱者也叨 恩竊祿知進而不知退言無補於時行不信於人年既老矣身又病矣始知見棄於世不得已而退若有羞里愧洞之稱云者則真我之所當處而未嘗有聞而知之者故思其次而八此洞其無何有之鄉乎其烏有子之徒乎客又曰此則聞命矣觀子之一生未嘗不修飭歛束也今則冠而不韜髮衣而不束帶坐而多箕踞者何歟且其居處之陋飲食之淡何以堪其苦歟

曰子嘗見夫山叟野老之韜髮束帶而危其坐者乎
華屋美饌而為山叟野老者乎子非某也焉知某之
志哉自是歲某之名秘某之迹使世人不知某為誰
某而遊於某里之中也歸歟歸歟莫與某人道也

起荒田說

乙未之春余始有意於為農得數頃田在薪伐里間
之則曰此良田也種五穀無不宜不濕不燥水旱無
得以為之病故耕之者得穀常多焉邇者人失其業
廢而不理者五六載矣余惜其美土之久棄也乃謀
起之於是求耒耜之堅緻者與耕夫之老於農者飯

二牛而往焉是三月既望之一日也觀其叢茅苞棘
竟卧擲比無一寸空隙地其根節盤錯據結雖以利
刃有不能易斷者余心自悔慮其有費而無成也然
既發之不可遂已乃駕二牛於一耒擇壯夫使執其
柄二人各牽牛繩而左右焉乃呵牛而試之其始也
如持鈍器鑿頑石憂憂其難哉久而後始漸漸然寸
起而人進耒刃所向有聲轟轟然如奔波激湍之中
大石小石相磨擊者茅根斷也見其所起處頑塊硬
土疊積累崩如戰敗之後強兵悍卒猶不勝其憤或
豎髮怒且走也然自是盤者解頑者破其土猶古其

力稍易人之服役者不自知其為勞而喜其漸有成
功也循此而不已則滿車之粟盈篝之穀可立而致
豈不足以為幸歟余於此有所反矣人心之中亦莫
不各有良田其町畦則惻隱著惡辭讓是非也其穀
種則仁義禮智也其為地平而無險其為土沃而敏
樹初豈有茅塞之理及其私起而為町畦欲生而害
嘉穀然後斯田遂荒而生生之理熄矣雖然其本則
未嘗亡也苟有起之者能以顏子之四勿為快牛曾
子之三省為耒耜隨其難克處克將去則一破之後
恢恢乎有餘地矣及其起也猶夫舊矣尚何患嘉穀

之不生也苟曰吾田已荒无方可起則是自棄之也其荒我荒之也其起我起之也不起耳吾未見其力不足者也噫彼田之荒也人猶可以為人斯田之荒也禽獸而已而今而後吾知起田之有先後也故為之說以埃起田者得焉

序

誠信契序

契何為而設也吉慶焉相歡死喪焉相悲如斯而已夫以人之一身上有父母下有妻子仰欲盡其養俯欲盡其育人孰不有是心哉至於送終之禮尤人之

所當自盡而率不能無憾焉者飢寒迫之也因窮感之也是以曾子有傷哉之嘆季路有追憾之悲以今觀之彼二子者俱以聖門高弟道德高於一世聲名顯於列國歸依之多交儕之廣半於天下則其於生養死送之際得人周賻之力者為如何哉而猶有未盡之憾况如吾儕者乎此契之所以設也嗚呼朋友之通財隣里之匍匐厥惟古矣今我同盟之人以朋友則如兄弟也以隣里則皆比屋也其於慶吊之禮雖不為契豈若是愬而必立名以維之明條以束之其亦襄世之意也雖然契之設豈端使然哉所以合

彼心為一心也視彼之憂猶己之憂視彼之樂猶己之樂不徒以物補之而以其誠不徒以財周之而以其信則於朋友隣里之中又別有一倍朋友隣里之情矣契烏可已也又曰世之所謂契者吾見亦多矣惟其以面而不以心故臨小利害便相較詰小而污其身大而辱其親夫本為養生送死設也而反以污其身辱其親則曷若不契之為愈哉吾儕之人幸以前所陳為勉後所言為戒則庶乎其無負矣

送河主簿弘道還鄉序

越之流人去國期年見似人者而喜況余之去國四

年而離鄉又加一期者乎又況河君之非特似人而
已者乎今來見之不亦樂乎雖然於余心有所惑者
存焉來汝河君請與辨之吾與若前有貴賤之分後
無從遊之好特鄉里之泛然者已翟公罷去門外張
羅此古今人情之所共然況余落此四罪之地寧有
再起之望乎則人之不後地於我亦明矣河君既衰
且老又無子若孫設或有後地於河君何有哉利害
无所據而君何勇氣來為古之論海者以南海為最
其言曰天傾西北而海獨居南比之三方尤遠且險
到今親見之然後益信其然島之距陸千有餘里而

鯨濤險惡颶風常多舟往來不利者首尾相望人之
視此海不啻若鬼關之危而已死生亦大矣而君何
冒死來為吾於鄉黨清濁無所失骨肉強近之親肩
相磨也朋友死生之契亦不小矣其餘淺淺者亦豈
河君之比哉然而无一人以一來相見發於空言而
又聞有往見者非人情之議其言固有理矣人情不
甚相遠而君何違衆來為夫以泛泛之分又處無所
為之地而忘大洋之險遠從他人之非議而為骨肉
心交之所不能為者河君乎而有心余不能忖度之
是何帛歟河君笑而不答但云生前一見誠幸誠幸

與之相對乎寂寞中跬步不相離毒霧鏹肥而不以
為苦炎風蒸骨而不以為病勸之休則不應人欲與
之出遊則不肯余又試問之曰河君一何苦哉人之
入此島誠不易也此地多有奇觀異跡盍一往觀之
以自壯平生之膏膽哉河君又笑而不答但云畧刻
侍側良幸良幸余曰咄咄河君何其每問而不吾告
耶今之世大抵皆波君其不欲波者耶吾非君惡知
君之心於我之心乎君非吾惡知我之知君之心與
不知君之心之心乎又惡知君之不答之為深答而
我之不知之為真知乎於其去也與之酒而不復問

書吳翼承筆帖後序

嗚呼此亡友吳君翼承之手筆也粵在癸丑冬余承召赴闕行到金陵適翼承自京南還相遇於客館

翌日將分手翼承乘醉縱筆書此四字

正公平大

以贈之

粵明年余獲罪南竄翼承被收司律遷于海西矣當初遑遽之際平日所著文字散失殆盡而獨此四字箴在橐中其亦出於偶然或者神物者有所護秘歟粘付壁上以替千里面目曾未幾時翼承已賦鵬矣思其人而不可復見則其書益可貴重旋割壁紙水滌而刀剔之去塵煤絕半宛然心畫猶疑墨未乾

也乃登諸帖上常目在之不猶愈於元賓之所與者乎翼承平生論議務主公正不立偏黨此四字蓋其所自受用而推以勉我者也我雖負罪猶有尊足者存則此四字用之一生無往不足而吾友切磋之益未有間於存沒矣翼承蓋未嘗死也余於此帖不敢為兒女悲惟期以不負贈言之意自勵云萬曆戊午秋七月既望桐溪鼓鼓子誌

擬剝啄行序

并詞

昔韓文公作剝啄行首章曰剝剝啄啄有客至門我
不出應客去而嗔蓋厭客也歐陽公擬而和之曰剝

禮樂之習而惟射獵潛漁是事視我冠儒冠則指為怪物見我對書籍則認為異類彼於怪物異類有何一分顧念而來我門剝啄哉間有村叟野老之日月至焉者則衆罵而群猜之至或讒之邑宰申令禁斷使不得相接故高籬牢戶索居枯處晝不見天日夜不見月與星當是時也雖欲聞剝啄其可得乎我非厭客客自我厭我則喜客客不我喜歐公尚矣固不可同歲論較之韓子不亦相反乎遂三歎而題其詞詞曰剝剝啄啄此非惡聲異哉韓子胡獨厭聽余茲之來魑魅與居世人皆棄誰造我廬枿以密棘固其

門局如在蒸炊如陷塹坑慢膚多汗睡魔侵之間人足音其喜可知過門不入誰復剥啄人或謂我子何太執余觀謫客出入无節子何閑歲不出戶庭余曰不然罪有重輕咎矣眚灾哀此自作天封地闕何敢寸越此邦之人不我肯穀踰閑交接非我所欲窮之所往况有官督人或謂我子何高潔人非棄子子不人屑哺糟啜滓胡不同醉余曰噫噫子言誠是余性之戇惡同喜異見利不趨知害不避三遭顛躓職競由此豈不自知欲罷不已再拜謝子願安承教昔者顏子犯而不較亦有康節笑談俗子而今而後吾知

免矣

竹杖銘序

自余入栢中四年于茲蟄坐不動而脚蹇澁尋常如
廁必待人扶持辛廣文有道見而憐之手斫龍孫一
枚來贈曰願為病人助得而杖之可免顛躓之患幸
而為之銘銘曰長不滿三尺扶我之顛大不如一指
其節則堅執之在手其色瑟瑟然擲之落地其聲益清
杖兮杖兮終始共貞

元朝自警箴

并序

噫余今年忽五十矣追思四十九年前處心行已

之道多有可愧於心者事親無可觀之行立朝有
自作之孽夫子所謂四五十而無聞焉者非余
之謂乎於是惕然反諸心思所以不負乎天之明
命者而為之箴以自警焉其辭曰

余生之養氣拘物汨僂焉厥躬如不終日本既失矣
何往不窒事親不誠事君無義自侮人侮牛已馬已
齒之尚少容或不思今焉五十始衰之時仲尼知命
伯玉知非余雖下品亦受天畀既已知之胡不顧諟
顧諟伊何曰敬而已衣冠必整居處必恭行必篤實
言必信忠防慾如城除忿如篲潛心古訓對越上帝

未發之前求其氣象既發之後戒其邪枉動靜交養
內外夾持靈臺澄澈方寸光輝允若乎茲是曰人而
以之患難不失素履以之安樂不至驕恣立脚雖晚
改過為貴聖賢亦人為之則是春維歲首日乃元始
書茲警辭服之至死

書孔戡墓誌後序

昌黎公誌孔戡墓發其幽光盛有所稱道余未嘗不
嘉其為人而亦未嘗不憾於出處之義也噫出處大
節也古之君子必於是謹重焉苟有一毫之可容評
議則其餘何足觀也彼從史何如人也軍帥之死而

自代為帥欲襲河朔之故而陰蓄不軌之謀則此亦承宗田緒之徒也為當日臣子者雖沐浴請討可也而聽其甘言詈勉留之其亦異於望望去之之清矣陰爭而不從會扣而不悛君臣父子之說逆順禍福之言非不詳焉且切而邈無改悔之色此可以油油與偕之時耶其人之不可教矣待五六年而後知其言之不可聽豈必空一府而後決也夫不知其人之不可教而就之則不智也知其不可教而猶且眷戀則于祿也不知其道之不可行而不去則不明也知其不可行而猶且遲回則无勇也烏在其嗜欲於

為義而畏避於利祿也哉或曰天下無不可有為之時亦無不可變化之人弗徇佛眊之召夫子猶欲往焉哉之事從史所以善繼其事者子何過之甚耶余曰若此則其為惑滋甚矣居亂邦見惡人在孔子則可下聖人一等如顏子孟子亦不可況如哉孔子之欲往者仁也其終不往者義也哉也非惟不以枉己為恥又與之強聒盡言似若忠於所事者然孔子之所不能化而哉欲化之哉之道果優於孔子者歟從史之驕驚而不悍然執兵尸之於市衢者幸矣誣奏之發殆亦晚矣嗚呼其危矣哉噫王適一狂士

也猶知從史之不道而不肯就其召曾謂戡之賢而反不及乎退之之言曰奴視法度士戡之謂也安有法度之士而受其奴視而不去乎退之前後與奪之權斯亦嚴矣余故書其後以責夫賢者之備云

德辨錄序

余嬰釁明時非所困而困焉于葛藟旣斃者于今歲行之半矣窮無不反迷久思復窺古人所以處困行險之道庶幾尋烟染芬以為動悔有悔之鑑於是裒集經史採撫去事上自西伯下至真西山凡五十有九人雖人品有高下言行有是非而要之動心忍

性操危慮深之跡則皆可以為後人師戒者也編成一秩名之曰德辨錄取易所謂困德之辨也者辭也嗚呼困者人之所難處也剛者過於矯激而有違寘怨之戒懦者淪於污諂而未免八谷之恥不激不諂而不失其所亨者其惟君子乎子程子曰時當困而反亨身雖亨乃其道之困也又曰學者學處患難貧賤若富貴榮達即不須學余之集成此錄者其亦學處患居賤之道而求以不困乎道而已茅根荒僻之鄉書籍少未能博採廣取又無明師友相與講正而筆削之豈敢與外人觀只欲私藏而自省云爾萬

曆己未夏五月既望八溪鄭某書于大靜之叢棘中

書晦菴與黃直卿書後

余讀紫陽集至與黃直卿書未嘗不廢書流涕也是書之作在於三月八日則去易箒纔一晨矣而神彩益茂言語愈謹諄諄乎其誨人之志眷眷乎其憂道之誠懇懇乎其念子之心切切乎其燕翼之意皆其平日之所存所發而不忘於垂盡之日者也或曰死生之際人所不能不動而至於諸事之節節分付為撓則無乃幾乎密歟曰此亦天理之所當然而人情之所必至聖賢亦人耳豈有異哉當此永訣之日而

不念千里之子則近於莊周曠達之見而知其已定而不有以安之則亦何以為聖賢之處死生乎噫今去先生之世四百有餘歲矣讀其遺書慨然若親觀手足之啓辱正頭巾之觸而山頽梁摧之痛不後於當日及門之諸子則人可以不為聖賢乎哉

王溪廬先生文集序

吾東方名公碩士之以文章名世者何限然求其所謂從心寫出如聖賢明理之文者則亦不多得焉惟我王溪先生之文庶幾近之矣嘗聞朱夫子之言曰有是實於中則必有是文於外試以此觀先生之文

而泝求其所以出此之本源則蓋沉潛而敦厚純粹而精明無纖毫輕浮駁雜之氣間其中矣先生之所以得於天者如是而又濟之以學問之力存養於中而有以守其虛明之體省察於外而有以致其酬應之用者已至於朴實之地而無掛於過差故其發而形諸文字之間者自然條理分明輝光藹暢意味踴遠音韵和平有非操毫弄墨務為新奇者之所能髣髴也是以孝悌之心積於中而見於辭章奏疏之中者懇切而惻怛忠愛之心積於中而發於啓沃陳戒之辭者誠信而光明真實無偽之心積於中而凡著

於輓祭銘誌行狀之作者端的而典重无一言之浮
溢至於吟詠之詞簡牘之言無不得其性情之正發
其精微之意而皆符於在內之沉潛純粹則真可謂
有德者言而程子所謂有是言則是理明無是言則
理闕焉者非耶先生不喜著述遺稿無多今其存者
皆人事之不可已焉者也丁斯文嘗鈔錄為若干卷
已鋟諸梓矣不幸兵火灰之流布未廣士林深惜之
先生之孫脊慨然有重刊之意來請於某曰王父文
集抄錄太簡願加錄其遺漏綴拾其間見且為一語
弁其首某辭以惜識不文者累年矣盧君之請逾久

不已則蓋有不可辭者存焉昔我先君子出八先生
門下最親且久觀先生孝悌之行而學焉而有得誦
先生典雅之文而常服其理勝義明某旣聞而知之
矣如是而終無一言則不惟辜盧君之望抑恐負先
君子一生尊向之意故謹就稿草中加取若干首添
補集中非敢有所取舍也特以其關於世教益於後
學者而存之有無之無所補開者而遺之汰裁之誚
其可逃哉嗚呼後覽斯集者不徒讀其文詞而先求
其所以為心者則孝悌之心油然而生忠信之行不
加勉而自進矣然則是集之行豈非世道之一幸也

哉

趙靜菴先生題蘭竹七絕後序

嗚呼道之顯晦而物之盛衰隨之物之盛衰而道之顯晦亦可卜矣當蘭竹之遇賞於先生而題詩於其上也蘭若增而馨竹若增而清於是乎蘭竹之盛極矣不幸先生之道晦而不明則雖有斯蘭孰蘭之乎雖有斯竹孰竹之乎况先生之言志人孰稱而口誦之乎香埋空谷神斷渭畝卒乃灰於兵燹而八絕清什無從而聞見之則斯蘭也斯竹也衰亦甚矣幸而七日來復先生之道大明於世則聞而知之者如趙

守倫金義元之徒相與追記八絕之詩而不記者只
一絕先生之曾孫婦柳氏不堪羨墻之慕思復其舊
物不貿市而手自績織成八帖絹素使其子松年求
名畫登蘭竹而仍書七絕宛然如姜葵亭之屏風尹
東臯之書畫而觀物反已之作赫赫若前日事物之
盛衰果不係於道之顯晦乎噫先生之道有顯晦而
蘭與竹亦有盛衰然則蘭竹之遇先生庸非數乎而
先生之道之顯晦因蘭竹而可見則先生之題蘭竹
亦豈偶然哉雖然蘭竹有形之物也道無形之物也
有形者有時而壞缺無形者無時而壞無處而缺昔

之晦也明未嘗亡也今之明也亦未嘗加明焉後之
觀斯畫者不以蘭視蘭而思先生馨香之德不以竹
視竹而思先生清直之節不徒誦其詩而思其所以
事親事君脩己治人之道而有得焉則斯屏之有補
於世教不其重乎葵亭諱聽東臯諱彥直皆一時名
流也因并錄之俾後人知其始末云

跋

南冥曹先生學記類編後跋

學記者南冥曹先生之所纂述也先生稟得壁立之
氣濟以高明之見早炳危機於數十年之前嘉遜山

中不見是而無悶專精敬義之學已至聖賢之域而猶不自滿足乃於讀書之暇鈔錄前言往行之功於已者編為此書以為修省之地程夫子所謂考迹以觀其用察言以求其心者非耶觀其為書首論道之統體次及為學論心之要而皆為圖以明之八道之階梯治心之規範瞭然心目如指諸掌此皆先生所躬行心得之實而非空言也至於致知以下十餘條則充功於日用而修己治人之方齊家治國之道靡不粲然備具末章聖賢相傳之說即孟子七篇末章之意而先生自任之重固有不可得以辭者噫使先

生而行道於當時則其宏綱大用豈不足以挽回衰
季之風陶鑄堯舜之化哉然而先生之道以邈而亨
者也其於世道則有一絲扶鼎之功其於自守則有
顏巷不改之樂百世之下必有聞風而興起焉者則
先生之遇不遇有何加損於今與後也哉嗚呼盛哉
文

逐瘡鬼文

天地廣大日月光明而人之生也戴圓而履方抱陽
而負陰乃能參而為三焉不幸其間魑魅魍魎恠物
異氣乘間抵隙雜處而煽亂徃徃戕人之命病人之

生汝鬼亦其一也天地大其量日月寬其明姑置諸不治之域故汝得以行宵臆於人間矣今來侵我數箇月餘耗余之精神削余之肌膚無味我食飲交戰我手足蓬余之頭苦余之吟人事曠而未修故舊踈而不來囚一室之岑寂鬱幽懷之不開微汝之故胡為至此汝之意豈不欲亟殺我也然我春秋鼎盛氣力方壯雖以汝鬼之毒安能肆然於我哉況我受命皇天待用下土天不欲使我有用於斯世乎則汝亦可以害我也如不欲其無用也雖百汝鬼其於余何汝之不能害余明矣吾必有以殺汝汝之生死在用

吾命與不用命而已遂命之曰高山之顛大海之邊
幽陰蔽鬱不見天日炎蒸瘴泄以陰以雨斯皆魑魅
之所宅魍魎之攸宇恠氣異物於是乎雜聚汝孽汝
屬亟走莫顧在汝有同氣之求於我無蠹賊之害否
者吾將御風輿揚雲旌排天門而直入訴汝罪於帝
庭奉赫赫之威靈整桓桓之甲兵燭龍含耀而窮搜
誰敢遁形哮虎當關而鼓氣詎能偷生空其巢而使
不得居斂其惡而使不得熾徇於朝市之間肆諸明
顯之地身膏電斧骨粉雷車必使無遺種乃已雖欲
噬其臍得諸

一鄉呈文庚子年

一鄉為依公論報使事臣之忠子之孝婦之烈是所謂三綱之行三者而一不立國不可以為國是以自古帝王莫不崇重斯軌既筆之書以傳諸後又旌其間以顯於時所以扶植之義至矣盡矣本縣雖十其室而自變亂以後死於孝者二死於烈者三忠義衛柳檀私奴銀浩所謂二孝子也草溪鄭氏完山李氏旌善全氏所謂三烈婦也嗚呼死者人之所難也宇宙歸來人物幾何而歷數其死於忠與孝與烈者則或曠世而一有之或天下而一人焉而已斯二子三

婦者乃能并生於一鄉之中人性之善果不可誣而
其為鄉里之榮為如何哉有此名節而湮沒可惜表
而出之非明府而誰伏願具由牒報于巡相使之轉
聞于朝而旌表其閭俾時之人後之人有所矜式
男子而過之者曰為忠孝者亦若是女子而見之者
曰為人婦者當如是則此屋可封之俗庶復見於今
日矣右人等就死顛末錄在于後此皆公論所著若
其溢一辭欺明府罔國家則一鄉雖無人亦不為此
忠義衛柳糧士人也丁酉八月舉家入黃石山城十
六日夜城陷糧負其母出城令其弟榎扶去以其父

老不克步糧還入賊中扶曳以行其父知不得免斥而去之曰我已矣汝其先出糧號泣扶持曰父在此子出何之俄而同死一刃嗚呼孝哉

私奴銀浩與其父入黃石山城城陷之夜失父於亂兵之中銀浩先出城求其父不得還入城中負父膝行至城底遇賊一刃之下父子同仆

草溪鄭氏僉知全珩之妻也母柳氏以孝烈聞于鄉達于朝鄭氏性行得於閨庭者為多戊戌四月十九日避亂入山谷倭奴猝至鄭氏被執賊迫令前行鄭氏不從曰汝賊何不速殺我我雖死義不可見汚

於汝罵不絕口賊怒而加刃與其女同抱而死之
完山李氏僉知鄭應辰之妻完山正之女四月十九
日避亂山谷遇賊被執李氏以死自誓曰吾何忍從
汝賊行其亟殺我罵不絕口賊怒而刃異其頭足焉
旌善全氏察訪鄭惟悅之妻玘之女年纔踰三十有
姿色先是避亂之日嘗請於其父曰願得小刀父曰
何用對曰脫有緩急無水不能溺無木末易縊若佩
此刀可以自裁父義之四月十九日八山谷遇賊與
其母同被執賊以刃脅使行全氏奮罵不絕口賊猶
不即害之曳之而去手攀木根木根皆絕賊不得已

刃之全氏以手蔽其母身一指先斷遂抱其母而死
身無完肉人謂之孝烈俱全云

祭文

祭猶子文

名昌世字希周

嗚呼哀哉天之生汝也若不偶然而天之死汝也抑
又何意汝貌如玉汝心如水汝言無擇汝行不苟九
歲失恃五載哀毀而人稱汝孝事叔如父愛弟如手
而我眼汝順自小志學劬書嗜炙不待程督勤也聰
明強記博達古今蓋其所性然也三捷發解兩魁文
會聲名籍甚巨擘一世九萬之翼若將搏風而空谷

之蘭遇霜先摧天乎天乎此何為者嗚呼哀哉人孰
不有姪而我獨有汝人孰不有叔而汝獨有我恩同
父子情若兄弟十載舉場每同筆硯半世山房常聯
枕席互為磋切相資羽翼而汝先棄我我復依誰嗚
呼哀哉去歲春夏余從仕于京聞汝病深徃欲辭歸
而汝書以止之曰病若日重思別之情姪豈下於叔
主乎余之不歸恃此言也其後榮歸幸得相見今春
被召汝病日劇相別潛然去留吞聲而猶恃神扶
庶將無虞豈意別未浹旬而凶聞遽至也嗚呼哀哉
余之汲汲南還意有在也而因山未卜葬汝失期數

月之間恩命兩至王程有限又失臨穴之痛汝視我
父吾未汝子明幽之間負汝誠多泉路他年何顏見
汝嗚呼哀哉聞汝將死之日言不及私則其於處死
生之際無一毫介念而猶以未見余為遺恨云汝之
愛我如此而我之待汝不相稱言念及此我何以為
心嗚呼哀哉人死而果有知耶抑無知耶地下焉可
相從耶不相從耶幸而有知而相從則只有先後吾
又何憾不幸而無知而不相從則何年何處更見賢
姪臨發草詞辭未盡情只憑薄脩冀汝來歆嗚呼哀
哉

祭 贈承旨吳公長文

以公明哲何不容時取友不端而至於斯黼黻之文
終不少售啓沃之辭空傳萬口同朝昔年動必相隨
我先南來公又踵之金陵邂逅一場慇懃秘蓄不吐
憂玉之焚何言此別永隔千秋山西海南相望悠悠
吾雖不殺伯仁由我吾罪當誅公又何辜乾清此日
我獨生歸余懷之悲曷有窮已 聖恩褒獎追 贈
顯秩悲榮兩至遠近拭目雖聞不哭奈難忍腸今來
太晚愧負生死猶不死公賴有四字煌煌寶墨烱烱
如昨吾雖不敏敢不佩服不昧者存鑑此心曲

甲寅
坐言

公事謫
死兔山

傳

鄭大益大有兄弟傳

丁酉之亂黃石一城之人為白士霖所罔敗衄殆盡
寔八月十八日也鄉人鄭大益大有兄弟扶其母使
其僕吾佐義負行兄弟前後擁衛踰山城之東北隅
緣崖越澗十步九僵行到長水洞口天已向明賊鋒
將逼不獲已擇深密處蔽其母兄弟各伏於其傍賊
先獲其母以刃背擊之大益大有一時叫號而出以
身翼蔽其母兄弟駢死於一刃而其母得全竟以天

此則尤不近情理當其時趨之以其母為問者豈不以其母在此其子安往云爾而釋兒有無曾不以介意則分遣而圖存亦一道也豈以愛有輕重而然也城陷前數日大益來到其家猝聞倭奴已犯隣境則勺水不能入口步由月城路行無人迹處四五十里冒矢石八城城陷之夜母子兄弟相失於交臂之間唯其生之圖不顧恩義者比比有之大益兄弟終始扶衛卒以身代斃而脫其母於兇刃以此觀之大益死孝之心自分久矣曾謂不愛母而能如是乎設使大益當初失誤之舉果有如議者之言而論人之道

重在其終終之所就如是卓卓則從前唇舌自當如
水之於海冰之於夏日也不此之為而猶追細微之
事欲掩其難掩之大節退之所謂不樂成人之義者
不幸而近之矣可憾也已大益字彥謙大有字彥休
草溪人雖無學術兄能明慧解事弟有慷慨志平居
養鷹犬躬漁獵供甘旨甚死時兄年丙午弟年丁巳
其母柳氏孝烈婦也是年二子死於孝越明年一女
一外孫女死於烈其僕吾佐義臨難不去盡瘁負護
卒與二主同死死於忠也孝烈忠三綱何其備於一
家耶嗚呼休哉余欲立赤幟久矣而衆咻之中難以

獨舌爭囁嚅而不敢發以待是非之定日下思之負
罪危命不可以朝夕期不及今圖之終沒孝子之名
則余亦與有罪焉故記其梗槩以俟夫首公論者得
焉

書郭義士傳後

庚子

朴從事汝昇傳郭趨事蹟甚詳且的殆無餘憾獨恨
夫白士霖罪狀略焉不詳斯豈勸懲之道乎時士霖
以金海府使為黃石城出戰將郭以守城將董治城
役役未畢賊鋒已動三邑軍民皆至城下居昌縣監
韓訥自縣馳來曰壁堅已破無復可為軍民間之皆

散去入城者十未一二士霖最晚自兵營來見城機
未完軍卒已散明知其不可守而深信降倭之言以
為賊急於犯京必不以此城為意乃言曰賊若不來
完城之功吾所當得雖無三邑人吾軍足以守之意
氣甚自得所謂吾軍者乃金海人新自賊中來者人
持倭衣履潛藏帑中脫有緩急著此衣履投降賊中
乃其計也士霖豈不知其輩之不足恃以為用而僥
倖賊之不來欲以完城為己功耳於是趨守南門士
霖守東北子城子城天險士霖所自占也及賊眾來
薄城中涵涵人見金海人日未暮皆已理裝為出城

之狀初昏斬北門而出士霖家屬隨之軍民瓦解勢
不可遏士霖托言巡城持鎗潛逃趨方戰酣南門未
之知也本縣官奴宋仁連者為士霖使令見其逃去
急來告曰金海令公已出進賜何為在此趨怒曰此
人訛言惑衆罪當斬略不之信夜半賊由士霖所守
處蹂躪而入趨始知事急欲往焚軍器未及而遇害
嗚呼偷生苟活士霖之常態不足深責而當其逃出
之時賊未八城矣勢不甚急矣何不與趨相議喻之
以知難而退之之義乎趨之聽也則與之同生可也
趨之不從也然後自為之所猶未晚也顧乃以趨為

虎口之肉而自為鼠竄之詐君子曰殺趨者非倭也
乃士霖也人言趨之守南門樓上有小窓開而射賊
閉而避允方趨之控絃而射也賊允掠額而過略不
變色左右欲閉之趨止之挺身當窓云趨之一死自
分久矣雖有士霖之言豈肯與之偷生也雖然趨仁
者也殺無辜士民而成已死義之名豈其本心乎其
意以為城之險阻如此士霖又以善戰名此可恃以
無虞矣豈料士霖之陰懷二心終以已賣賊也甚矣
奸人之情狀也始幸於成功則與之同事終臨於危
難則脫身先逝此果與措刃殺人者有間乎嗚呼殺

人者死士霖所殺非徒趁而已孤三邑之子寡三邑之妻者不知其幾何則士霖之罪固不容誅或者以爲士霖及其家屬與衆偕出非先逃也此兒童之所不信其時入城者俘戮殆盡雖以匹夫匹婦之單身健步者鮮得免焉上霖家屬無慮三十餘人有七八十老焉有四五歲幼焉而無一人相先後者無一人顛頓傷墜者果非先逃之驗歟抑不知天之眷愛不忠之賊使鬼護神扶而然耶嗚呼公論不白邪議橫生使士霖久保首領可痛也已

論

聽之也不難然則人臣之諫其君也其將以口乎以口則未棟既危之事而貽禍於天下以心則可救垂敗之勢而措安於國家則不諫於口而諫於心者茲豈非善諫君者也然則張良之不諫愚當曰善諫而所以謂之善諫者以其諫於心也當趙王之將立而太子之將廢也以人臣輔弼之道言之則所當面折之廷論之批鱗之不憚而碎首之猶甘也以君子納約之理論之則先事強聒非所以自牖也口舌起爭祇足以招尤矣此良之所以寧諫於心不諫於口而不諫之中有諫之者存焉夫高帝之欲廢太子也久

君而有以撥轉其心之機則莫若以心諫之之為愈也是以一言之讜未嘗發於其口而一念之諫未嘗絕於其心心存乎中者也言發於外者也存乎中者既一於諫則發於外者自不得不諫矣其心以為我之所以諫於心者如此故所以發吾心而代吾言者必待乎人矣故當呂后之要良畫計也首以四人為之羽翼所以發其心之所未諫而代其言之所未言也袞衣博帶鬚眉皓白則身是四人之身而志保漢室擬扶太子則心是子房之心也端趨前對各陳姓名則名是四人之名而辱被慢罵愛此仁厚則言是

子房之言也。心子房之心。言子房之言而卒能復太
子於幾廢之後。安漢室於既危之地。非四人之力。乃
子房之力。則子房之諫於是乎至矣。嗚呼。存乎心者
無迹而難見。發於言者有迹而易見。故世之人皆以
子房之不諫為真。不諫而不知。不諫之中有大諫焉。
以子房之不言為真。不言而不知。不言之中有大言
焉。是徒觀其發乎外而不察其存乎中者也。徒知其
諫之諫而不知其不諫之諫也。嗚呼。期期知其不可
者。周昌之所以諫於始而不能杜其欲廢之萌焉。欲
以頸血汚地者。叔孫之所以諫於後而不能絕其欲

於其身則其所扶之者雖身而所以使之扶之者亦以其義也西山採薇之日不食周粟之時其節益堅其義益彰使天地之綱常賴而不墜君臣之名分得以不紊然後得其死所視之如歸則太公扶之之功於是乎大矣且伯夷之所以非武王而諫之者為何事耶非以懼萬世之無君也耶武王天下之大聖也以臣伐君天下之大變也以天下之大聖行天下之大變則彼天下後世之窺覷人國者孰不以武王為之口實而猶幸伯夷之義得行於萬世故亂臣賊子猶有所憚而不敢接迹聞其風者莫不興起而頑者

興矣而萬世之無君尤所當懼也彛倫之墜地尤所當憂也則太公之心即伯夷之心也太公之義即伯夷之義也行一時之義而心萬世之義者太公則太公之義可謂兩全而其所以扶之者非特扶伯夷也實所以自扶矣安可以是非其類而與之者歟噫一扶人而扶天下國家於萬世終亦有以自扶其身之義此太公之扶之所以為善扶者也世之人皆知太公之扶伯夷而不知其扶之之所以大愚所以極論而明卞之者亦闡幽顯微之意也

箕子受封朝鮮論

武王之土也以殷之臣而受周之封無乃臣於不可
臣者耶噫此豈衆人之所能知者哉彼箕子之身果
何身也耶天之生箕子者亦何意也耶自著而待人
以明者天之理也受天所付而耳目斯民者聖賢之
責也治水功成洛書呈瑞而法而陳之者前有大禹
推行其理增益其篇而發而明之者後有箕子則天
之生箕子於殷者即生大禹於夏之意也前徒倒戈
周命維新八百商祚一朝淪喪則以義同休戚之臣
子而忍戴不可共之周天乎敢諫而死有如此干存
祀而去有如微子則箕子一體同道之人豈不知死

依故其意以為我雖不在中國而中國猶有我也於
是復以八條九疇之教行之於東國使莫非天民之
朝鮮得聞大道之要而道之在天下者無所往而不
明庸詎知非天之意乎惟其天意也故箕子不得已
而受其封又安知其臣之也實所以不臣也受之也
實所以不受也設使當時無武王之聖而無傳道之
人則天豈使箕子受封於朝鮮哉將必受封於中國
而不以為嫌也然則其受封而不以為屈者以其屈
於道而不屈於周也嗚呼箕子豈區區焉以不受周
王之封明其不臣周之心而棄其天之所以與我者

乎當其紂惡貫盈宗社將傾而箕子之不死不去而甘心於為奴者夫豈惡其死哉以其身之有重於傳道而不能自由也然則其可自由於武王有天下之後而守其小節也哉其所以不即死於陳洪範之後而受封於朝鮮者莫非天之使然也其可違天而不受其封乎或曰伯夷亦不臣周者也不食周粟餓死首陽而箕子則受周之封以終天年則其道之不同明矣子何獨謂之天乎既謂之天則伯夷獨非天乎曰皆天也欲其扶節義於萬世則餓死首陽欲其明大道於天下則封朝鮮伯夷之死箕子之封何莫非天

也觀其稱而汝於告武王之辭紀商号於十三祀之意則不臣周之心未嘗亡於封朝鮮之日矣尚可謂伯夷之不臣周而箕子之獨為臣乎不然易何以曰箕子明夷利貞乎

道覆載萬物論

論曰天何時乎道而已矣地何時乎道而已矣自未有天地之先而道具焉道之體也既有天地之後而道行焉道之用也是以上而覆焉者天而所以覆之者道也下而載焉者地而所以載之者亦道也天而無是道則失其所恃而不得行乾之健吾未見其所

惟不覆而將必墜焉而已今夫地雖廣厚之至而苟
死此道則吾知其不惟不載而將必陷焉而已日月
之明而非此道則無以保其為明星辰之光而非此
道則無以保其為光矣然則道果不可以覆載萬物
歟傳曰不誠無物所謂誠者所以誠此道也不誠此
道而能有其物者吾未見也且易曰一陰一陽之謂
道夫天地者陰陽之體陰陽者天地之用也春而生
物夏而長物者天地之陽肅殺於秋收藏於冬者天
地之陰也兼陰陽之理而主生殺之權者道之用也
天地賴陰陽而成覆載之功陰陽賴此道而成天地

之道然則道者天地陰陽之所恃而為用者也其覆載之實益可驗矣曰天以覆之地以載之者物之所生成而今謂道之可以覆載則果可捨天地而論覆載之道乎曰不然夫道者理也天地者亦理也無道外之理亦無理外之天地故道者出於天而天地者道之所寓也論道而不論天地則其為道也外理也論天地而不論道則其為天地也亦徒而已天地以此道而不息故能成覆載之功道以天地而得行故亦能行覆載之功此天地之所以為天地道之所以為道而非道自道天地自天地者也是以聖人法

愚拙不忍為此也敢有一言之獻而相國肯信乎否
白士霖應死之罪前既面陳其略而相國亦既深然
之矣今者縣人幼學禹惇劉義甲等十餘人以士霖
殺其父兄探復讎之刃杖討賊之義懷疏千里遠叫
五雲其情誠可痛而其義誠可尚也第念窮鄉晚出
足未躡王都既無援引於朝行又乏知舊於城中雖
有格天之誠而何緣自達雖有感人義而誰肯聽
信况廷臣既以無罪誣啓而脫其死云則雖聖明
在上而安能必其不主於先八也賢公卿在下而安
能保其不忽於賤言也有必復之讐而無可復之勢

則九原無辜之寃何時而可洩人間一天之恥何自而可洒也人皆有父兄矣見其號天呌地之痛孰不為之流涕也士霖之罪非獨數人等所讎為公論者莫不痛心何者倖於成功而外為守城之形急於偷生而先為鼠竄之計使郭趙宗道等由已而死於一刃三邑無辜之士民自我而肝腦塗地敗軍之罪殃民之惡萃於一身唯此數語足以斷斯獄矣相國欲得其詳則惇等袖中必有所藏矣若惇等之疏得達天聰而聖不自斷議及大臣則相國於此可陳其不可不殺之狀矣雖例下其疏議不及大臣而

相國亦可挺然獨啓陳其必殺無赦之義則天聽庶可回矣民讎庶可復矣當其時相國方在南中熟知黃石顛末故惇等之所望於相國者為不淺矣若謙抑太過不肯為一言以為公論之赤幟則奸人有福矣國家無祿矣奈如之何大抵為相之道不徒清苦簡默之為貴也必明以辨邪惡斷以行威刑使為善者有所勸為惡者有所懼然後庶乎無負於相道矣某敢以此為知遇之報不以人微見棄則幸甚情隘辭盛不知所裁

與鄭仁弘書

昨修候狀附吳成兩君之行未知台照及否即聞道
路之言自上又遣禮官敦諭勉起云伏惟先生不
得不赴 命第念衰年行李勞悴必多雖是神扶實
多可虞區區遡慮曷有紀極某以親病彌留又負路
左之拜恨歎如之何然有一言不得不仰稟者故不
敢䟽外而供一哂焉竊聞臨海之事自上斷欲全
恩終拒執法之論請罪固有司職也而全恩亦 聖
上親親之盛意也議者有云臨海平日所行固不容
誅而逆謀虛實未可的知雖有一二愚癡之控辭何
足為証此語誠如是也 聖上無故欲戕天顯之親

而殯殿劔椎之說皆出於無根敢為此說者非愚則
險也固不足掛齒而但有可諉者逆謀雖露而閨門
之內恩常掩義則廢為庶人待以不死是或一道也
淮南之反謀已著矣其死乃自殺也非加之刑也而
布粟之謠文帝病之若朝廷終始執法必以得請為
期則悲謠之作安保其必無乎賤見以為連月伏閤
之請既不負執之而已之義矣豈必堅持不變終傷
於聖上親愛之天也不審如何如何且銓曹用人
若偏主一邊則恐乖於出門同人之義也況此一邊
未必皆君子彼一邊未必皆小人則所當博選公明

正直之士布列清要與之共治天職不宜先問某人
之為某邊也我國朋黨之弊甚於唐宋之末四分五
裂互擯相援附已者雖不肖為賢異已者雖賢為不
肖惟以植私黨為務而置國事於相忘之域此所以
時事日非而不可收拾者也伏惟先生今此之行方
成朝廷恢張公道絕去私論其人可用則雖南且西
不可錯也素無名行之可取則不可以附於北而必
置之清要也不審如何如何某出入門下未為不久
若含蓄其所欲言者而不為吐露則是以面貌事先
生也先生亦何取於面諛之人而使之容跡於門屏

乎竢親病少間擬當親承明誨不圖先生之行出於
意表而某又未得進拜也敢以書為替而仰干採芻
之聽倘不以人微見棄則幸甚幸甚

上咸鏡監司韓俊謫書鏡城判官時

某以遐遠孤蹤未嘗登龍門望清光而一拜之餘便
吐情款既辱之書又賜華什以復絕塞之行小人何
幸得此於大人君子之前哉揆分感悚飽德歌詠窮
荒寂寞之懷頓覺十分消遣也竊念大人之所以辱
顧者如此而妄自卑外不達所懷於執事則非所以
事上無隱之道也况既承命何所憚而不盡之哉此

府乃北路喉舌之地也以某之才之踈手之生固知
一日難居而天涵聖恩報效無路逐日勤瘁期以
死而已而治法征謀日就虛踈宿弊殘氓無策革甦
坐衙刮席對殮愧素而已今年大侵之灾鄙府尤甚
加以官空日久民瘼益甚盈庭號訴者皆是餓鬼之
貌滿案頽積者莫非冤痛之事而御使不以上聞字
牧又非其人下有閭下之仁惻然軫念亟舉拯焚極
溺之手則鏡城一域皆未免繫索之鬼而閔方喉舌
無復下手處矣雖然今日救荒之策不在於設幕賑
濟而在於減徭役寬租稅多移河內之粟不奪南畝

之時而已伏惟閣下威望冠萊公也鎮撫張傘崖也
減徭寬稅已無所不用其極興學治軍并舉而不偏
廢北路之民莫不延頸鼓氣願為閣下而死某今日
之請非為一鏡民也乃所以為閣下地也各項弊瘼
既以報狀而又書于別紙冀垂仁人之矜察施之則
人民再生不施則喉舌空虛其所係輕重惟閣下裁
度之情迫辭慙他不盡喻

與李丈大期書

前冬因豚犬八來聞吾丈所作為竊不勝過慮以為
侵睡虎而蹈其尾非計之得也未幾果爾臆中以吾

丈之高明宜其見及於此而未免循蹈迷轍自度鬼
門其亦時命使然耶抑或造物者欲玉吾丈于成耶
是則不暇詰也而七十之年投身荒僻無子弟焉左
右無親舊焉往來以吾丈平時居養其何以堪遣也
嘗觀輿地勝覽稱其島水路險惡又聞其遠近可半
於瀛海云亦非朝發夕至之地也况開創未久居民
不稠凡所資以為命者想無以異於吾所處也權忠
定遇晦齋於道曰一何赫赫也此語誠可笑也兩地
休咎不須相問惟當以義處命隨遇即安時於靜中
披閱古人書樂而忘憂此實耐患之第一條也朱夫

子引陳了翁之說曰今日真試一過矣吾儕今日攷是自試之秋也如何如何

荅林樂翁問

壬戌

鼓鼓子八海九年魑魅與為徒距閭羅界不咫尺德
恩林樂翁以書擲之海問窮愁且曰願吾兄寫出謫
中之山川如是也風俗如是也起居眠食又如是也
別成一幅使我掛諸壁以寓瞻濤之懷云云蓋出於
相思不忘之意也鼓鼓子感其意強步禿尖奴以荅
之曰島中之山川風土金冲庵先生謫居濟州時盡
錄無遺憾矣大靜形勢余曾於圍籬記亦略及之以

寄夫故鄉親友豈樂翁偶末之見耶今不敢更贅陳
言只以栢中所聞見與日用事為者為樂翁陳之大
靜之縣東門之內有叢棘高數丈東西數十尺南北
三四十尺者乃鼓鼓子所居也人或稱之曰鄭東門
鼓鼓子以為纍纍之狀無異於東門之人故受而不
敢辭南去大海只十里每有風雲之候則潮汐怒聲
澎湃洶湧恍若山崩雷動甚可怕西距園林數十步
樹木蒼蔚群雀飛集每夕爭枝啾嘈亂耳時有杜宇
者月下來叫其聲尤可悲縣為一島南邊之窮處故
隨陽之鳥百千為群集于海汀蓋過此則無邊大洋

雖飛類不能過故也往來聚散必由東城之上聞其
嘒嘒淒吟之聲未嘗不驚起動心此則籬外之物而
接於耳者如此當初入此籬處苦一物無所見倩縣
宰移野梅一叢植于屋之東南角今高數尺餘每於
臘月開花冷蘂疎香可觀而不可翫又移叢竹植于
屋之東南西三隅蓋慮其或不生而種之遍也曾未
幾時俱生并抽子若孫今踰百餘箇鬱密成林宜於
夏甚又取稚松於漢挈頂上種至數十本而生者僅
四株其初不滿尺者今已七八尺偃然出籬端已有
霜雪姿又栽黃菊於松之下地狹不能多種只依河

圖居中之數待霜發馥香艷異常此則籬內之有而
媚於目如此於是鼓鼓子着道冠曳竹筇逍遙於四
友之間撫蒼髯訪香魂蔭清陰而餐落英不知日之
將暮矣興闌則輒危坐對案案上有書數百卷而經
史相雜瀛洛閩閩之書又居多焉觀書不求甚解雖
有疑義不肯問於人涉獵而過不要精熟蓋其性然
也粵自知非之歲惕然懼夫本源方寸之地荒無放
倒始有意於喫醒收治之功而若存若亡殆無絲毫
之效每夜鷄初鳴拂衣端坐向東鼓齒如其數仍誦
有宋諸賢圖說箴銘贊十餘篇及屈三問卜居漁父

三篇諸葛忠武侯前出師表非有疾病憂患未嘗廢也又患身多疾病而海外無醫藥粗涉軒岐砭熇之法略究原俞井榮之理而間有試之偶有所中故方書數秩常在其案若夫朝夕以為命者則專仰官廩而其數不多或有不愛者減其數而不以為意乃令蒼赤數三人服役於荒疇間以繼其不足盤中只有蔬菜數器或有遺以魚肉者未嘗不受雖無亦未嘗求於人酒量太減於前飲綏七八器輒不省人事間有因酒可怕之事欲止而不能止蓋鼓鼓子夜不能寐雖冬之夜耿耿達朝者居多若得酒氣必昏然酣

此其為不絕之道也然非人勸我我勸人則雖有
酒不得飲此亦其性然也此則日間起居飲食之節
也噫籬中事固可為樂翁道而足跡未嘗出尺寸地
自籬以外雖欲詳焉得乎人來問曰觀子處困之道
未為不善而毛髮盡白形容枯槁視諸涪陵之氣貌
鬚髮一何遼哉鼓鼓子泫然不能答乃作白雲之歌
島中歌兒頗能傳習被諸管絃云

與吳正言翼承書

丙辰仲夏九日

天西地南魚鴈難通彼此休咎何緣聞問以我之苦
思知兄之亦不忘也兄所住峽中也風土不并海中

想存息之餘所得於經史中者視前奔忙之日不啻
萬萬安知天不欲窮之於斲增益其所不能也僕之
心事與兄異老母臨年當初雖不得兩全望雲之淚
倚問之懷倏爾三載于今雖頗以理排遣出於至情
者能復過絕耶加以所寄梅屋去海未十里毒霧之
所燠炎風之所燒虫蛇之與處鬼魅之與居形非木
石能不病乎白髮滿面形容枯槁忽忽荒荒已作一
箇狂癡底老漢堪可一嘆年前或謝或慰已寄數度
書皆曰任重傳致舊栖安能保無浮沉兄奚之往來
會稽者必由迎勝倘有尺素之辱庶有飛來之路而

迄未有也母乃兄過於慎密而不肯念及耶凡事無
非命也禍福之來非智力所能避但當順受安之若
命此吾儕今日相勉之道也如何如何其初論啓之
辭大槩指何事耶專攻取友不端耶抑別有所指耶
今去友人乃曾受武學於僕者聞吾念兄之言自願
往見斯亦嘉矣兄邊消息母惜細示以破鬱紆言長
只此伏惟遠照

荅宋明甫書

浚吉戊寅

老物之思見足下甚於足下之思見老物而各以病
拘久未會合人生一見亦有數存耶茲承情翰審得

幽居興况完勝慰豁不可言抑老物之不能無憾於
中者一壑形勝欲為卜莊者久矣東華於奔走遽為
疾足者所奪其何能無介然耶然此心耿耿不但已
也早晚策駕癰扣雲扃則烟霞鳩鷺者必有所取捨
於新舊矣呵呵力疾修謝胡草不宣

與崔季昇

硯書


飲名已久相見太晚且於稠廣也未得從容承誨可
愛風神常在夢想中即惟老炎雅况休勝僕自洛還
屬耳先賢心跡賴吾兄瀝血之文晞白無餘儒林幸
也亂後事蹟吾鄉亦有若干可錄而先人姓名亦在

其中故不敢自為屬諸校任勾幹只依前日已成之
籍書上耳葦恨稽緩至此恐未及錄於大書特書之
筆也然此事體面重大不可容易為之必廣如聞見
從容哀聚以就十分完備然後庶無後憾豈可限以
時日苟焉成就而已乎僕亦嘗有意於此而人微事
巨久不敢發幸如吾兄者為之真可謂稱其事也吾
南才府之稱久矣至於亂後精忠大節孝子烈婦此
肩接迹不一而足而旌表之典未遑於明時太史之
筆未及於幽遠將使磊磊落落者泯泯而無所傳吾
兄收而錄之表而明之欲使軒天地而不滅傳億萬

而不朽其責不既重乎責之重則其成之固不可輕也前月上洛時見李相元翼語及此事僕以吾兄所為告之李深嘉之曰吾前為軀使時以聞見錄成二卷將進于上前自上以更加詳實為教故還送本道未推矣又曰裒集之後當就文章巨公穩括成書然後可傳於後吾亦欲以將成未成之意為一語書其尾云恐吾兄之不得聞故及之耳今茲錄送者皆一鄉公論無一毫可疑望錄之無遺也郭義士事蹟詳在朴公傳中皆足取信者善惡皆當存之故僕嘗著白士霖罪狀為一覆瓿之資今忘其荒拙而并

瀆 天聽則此非士子自重之道而頃年湖儒之事
不幸而近之鄙意以為窮達命也不容人為我之將
達也彼不得不解我之終窮也雖有百千疏何益自
外至者固當順受而已不審僉尊以為何如鄉中唯
有一權兄與之同志不幸今也則亡痛哭奈何以此
仰復上舍兄別問不宣

桐溪先生文集卷之二



集懷同

二